

東
華
續
錄

東華續錄

王先謙

臣周爾蕃恭校

秋七月癸卯諭向來親王郡王固倫公主和碩公主門上總管首領太監俱無給與頂帶之例原以此等太監在親王等門上服役非承直內廷者可比是以向來雖有總管首領名色並無官職但親王郡王爲宗潢屏翰公主係皇帝親女其諳達太監總管首領太監內卽酌量給與頂帶一人尙不爲過分從前親王郡王公主家太監亦有特恩賞給頂帶者嗣後親王郡王固倫公主和碩公主太監內各准給入品頂帶一人將姓名報禮部內務府備查不得私有增益至固倫公主和碩公主均爲皇女敵體藩封一切禮儀護衛會典內並未定有等級遂至體例不一互有增損嗣後固

倫公主品秩著視親王和碩公主品秩著視郡王其額駙品級頂帶仍照會典舊例至公主下嫁時一切禮儀護衛員數固倫公主卽照和敬固倫公主之例和碩公主卽照和嘉和碩公主之例著禮部內務府會同定議具奏載入會典則例永遠遵行○伊犁地震○甲辰諭軍機大臣等據李世傑等奏二十一二三等日大雨如注洪澤湖內雨後復長水一尺二寸連前長至一丈五寸水勢浩瀚山圩五壩封土見仍實力堅守其運口以外東清壩已展寬五十餘丈新建之禦黃東西壩共展寬二十餘丈俾清水暢達刷沙敵壩溜船剋日可以渡竣等語前因黃水盛漲清水弱小朕洞悉盈虛消長之理知清水必有旺盛之時曾諭令李奉翰等於高家堰一帶隄防工段先事熟籌慎之又慎今湖內見已陸續增長高堰誌椿長有丈餘果不出朕所料該督等更宜時刻留心應將禦

黃東西壩再行展寬十餘丈俾清水暢注有力既可刷滌浮沙而
又不至壅遏生患方爲妥善不可膠柱鼓瑟第拘泥蓄清之說也
至山圩五壩雖應堅守但上年亢旱日久高竇諸湖俱經乾涸足
資縮蓄朕意若將智信二壩開放俾清水宣洩入湖豫備將來水
小時濟運足資容納似更有益著傳諭該督等相度機宜酌量辦
理不可固執亦不必遷就也再阿桂在浙諒必因河口水小籌慮
著將李奉翰等節次奏到清水長發各摺及見降諭旨鈔寄閱看
○論據常青雅德等奏查究殷士俊得受署泉州府鄭一桂餽送
金葉一節據鄭一桂供稱與殷士俊原係親戚上年富勒渾調任
兩廣殷士俊跟隨同往路過泉州曾將金葉五十兩託殷士俊轉
送等語富勒渾受朕深恩歷任督撫竟敢明目張膽收受屬員餽
送營私飢法實出情理之外前據孫士毅續審出殷士俊上年經

過泉州收受鄭一桂餽送金葉五十兩富勒渾曾經查出因該犯與鄭一桂素有親誼是以饒了方以富勒渾知情縱容尙不疑其有染指分肥之事今此項金葉既係富勒渾自行婪得又何怪其饒恕殷士俊如此貪黷敗檢尙得如阿桂等前次所奏一任家人長隨招搖婪索自不知情可乎昨經降旨以富勒渾縱容家人婪索多贓及勒派書役銀兩先侵後吐各情節尙爲從前案犯所有較之雅德以密諭傳詢之事竟敢昧良徇隱公然欺飾者其情較輕今富勒渾於去任後尙收受屬員金兩則其在任時恣意婪索可知實出意想之外已諭令常青等詳查此外有何婪索情節據實速奏今看富勒渾之罪又浮於雅德矣著將常青雅德原摺並朕折角處所鈔寄阿桂等嚴切審訊諒富勒渾亦無從狡賴一俟雅德解到浙省卽速行定擬具奏發摺後曹文植可卽順道回籍

看視伊母阿桂舒常卽押解富勒渾並全案人犯前來行在候質
將此由六百里傳諭知之仍將見在審訊確情迅速覆奏○己酉
諭據特成額奏見已調補雲貴總督雲南按察使特昇額係伊胞
兄例應迴避等語特昇額係特成額胞兄自應迴避且向聞其居
官平常質之伊弟特成額言亦相符難勝外任著來京以部屬補
用所遺雲南按察使員缺著王懿德補授○庚戌諭三通館進呈
皇朝通志職官略一門朕詳加披閱其中所載文武官階諸多未
協國家設官分職文武兼資在文職則內而閣部院司外而督撫
以至守令丞尉階級等差互相維制至武職爲國干城同膺心膂
之寄其階級自應與文臣相埒方足以重閫寄而勵戎行今志內
文職則係正一品起而武職則係從一品起旣顯然少予一階且
文自正一品至從九品共十八階武職自從一品至正七品止十

二階多寡顯有懸殊體制卽暗爲隆替非所以著朝章垂令典也大抵議定官制編纂志書多出於文臣之手其意在乎重文輕武殊不知國家設立武職原欲其折衝捍衛其責並不輕於文臣有明之季文臣用事於中武臣宣力於外一二臺閣本兵科道書生構謀倡議俱足以掣武臣之肘卒致武備廢弛疆圉孔棘國事遂不可爲此皆重文輕武之流弊不可不引爲殷鑒所有武職人員見在所缺正一品之階應照朕前次欽定領侍衛內大臣將軍爲正一品之例增入一階其自正七品以下較文職所少之五階亦應於內外武職衙門微末員弁內按其職守酌定正從照文階一體釐正以昭畫一再志內載舊例武官正從一品俱封榮祿大夫正二品至從五品俱封將軍未爲允當嗣後更定新例則皆稱大夫因思將軍爲專閫主帥大夫係文臣之稱乃舊例則封將軍而

今又更封大夫名義殊覺混淆嗣後武職正一品至從二品俱應封爲將軍正三品至從九品應分別酌與都尉騎尉校尉等字樣遞爲差等以示區別至向來文職遇有降級處分如降一級者俱以正從計算止於正降爲從而武職則降一級卽降一品辦理旣不畫一而武職官員遇有處分卽官階較大者轉瞬卽降至末弁相形未免偏枯嗣後武職處分亦應照文員之例以正從覈計議降庶爲平允夫文武初無重輕官聯要於整肅必當詳行更正較若畫一載入典章所有一切增改事宜著軍機大臣會同大學士吏兵二部詳晰定擬具奏尋議查中樞政考內外武職共十六階較文職少正九從九二階應請將藍翎長爲正九品太僕寺丞署固山達爲從九品綠營經制外委千總爲正八品外委把總爲正九品額外外委爲從九品以足十八階其各階內請增烏嚕木齊

都統爲從一品委署前鋒侍衛下五旗包衣參領爲從五品委署步軍校內務府領長爲從六品委署親軍校前鋒校護軍校驍騎校副護軍校爲從八品請改包衣佐領察哈爾副參領佐領爲從四品營千總爲正六品衛千總爲從六品其正四品之駐防參領正六品之監造火藥官正七品之弓匠固山達請裁再降調處分提督主遊擊本以正從遞降都司以下有正無從擢用時升一級卽升一品降調照此亦屬適均至封典名號請將一二品爲建威振武顯武功等將軍三四品爲武義武翼昭武宣武等都尉五六七品爲武德武德佐武略武略佐武信武信佐等騎尉八九品爲奮武奮武佐修武修武佐等校尉纂入例冊咨三通館增定從之○壬子諭李世傑等奏初三四等日大雨滂沱異常傾注清水黃水並中河之水同時並漲山安黃河北岸李家莊工尾及湯家

莊二處先後漫塌隄工五十餘丈及八十餘丈不等清江迤上北岸二井樓隄淮關迤下南岸之周家莊樓隄均於初四日巳刻漫溢過水各塌寬十六七丈又將清江南岸千根旗杆迤下之五孔橋隄工漫缺水從玉帶河旁溢以致清江一帶被淹等語此事朕於春閒早經慮及蓋盈虛消長理有固然連年黃水盛漲清水弱極卽知清水必有旺盛之時曾諭李奉翰等於高家堰一帶隄工加意修防熟籌妥辦毋致臨時周章今果有此數處漫溢朕更事已多於盈虛消長之理隨時體察先事訓諭該督等謹守高堰隄工啓放智信二壩拆展東西壩口門以資宣洩該督等亦能懷遵朕訓逐一妥辦先事豫防見在雖有漫溢處所而高堰隄工得保平穩漫水所過人口不至損傷此實先事豫防之效此處漫溢究因清水陡漲又值疾風暴雨人力難施以致搶護不及朕實不忍

治伊等之罪所有李奉翰奏請交部治罪李世傑書麟奏請交部嚴議之處均著加恩寬免卽疏防各員弁亦著一體寬免上年李奉翰於運中河內不早建閘座以致水無存蓄又不將清口東西兩壩口門收小清水宣洩無餘節節貽誤是以降旨將該督等降爲三品頂帶以示懲儆今歲該督於防守宣洩各事宜尙能遵朕指示妥協辦理雖有見在漫工究非去歲貽誤可比是以免其治罪此時該督等亦不必驚惶無措惟當公同熟籌一面先將漫口兩隄頭盤鑲裹護不令塌寬一面購備料物及早興工堵築以期迅速歲事至漫水經過地方民田廬舍未免被淹淮安各屬上年被旱本重今歲幸賴麥收接濟秋禾又有被水淹漫者小民生計更加拮据朕心深爲憫惻該督等卽飭派出各員分投查勘酌給口糧實力妥爲撫恤務使均霑實惠毋致一夫失所以副朕軫念

災黎至意所有淺闊漕船並令設法籌辦俾剋期度竣迅速通行
除已諭知該督等妥速辦理外所有四月內朕早慮及清水增長
豫令留心寄信諭旨著交留京王大臣大學士九卿閱看並著發
鈔通諭知之○丁巳諭據劉秉恬奏審擬曲靖府甯甯縣武生尹
在奇在平彝縣中箐地方被賊搶奪財物並毆傷挑夫孫起龍一
案已批交三法司覈擬速奏矣細閱摺內情節尹在奇貨物被李
小六等搶奪之後各犯由南小路奔逸而尹在奇等誤從北路跟
追遂誣指毛奉儀賈朝相趙有保爲正賊彼此不服扭結呈控經
曲靖府知府巴尼琿催銅旋郡集犯審訊因賈朝相趙有保堅不
承認各加刑責隨俱誣服該府復因催銅公出檄發署霑益州知
州戴書紳收審亦照原審情由錄供通詳趙有保賈朝相受杖傷
重先後身故復經審訊別案究出正賊按律定擬請將未能審出

誣告實情之前任曲靖府知府巴尼琿交部嚴加議處填報不實
瞻顧上司之前署霑益州知州戴書紳革職所擬殊覺有意軒輊
巴尼琿於屬邑搶奪重案並不虛心審理究出誣告情由輒摺訊
致死無辜二命雖決責如法究係原審之員其咎較之依據具詳
瞻顧上司之知州戴書紳較重該撫卽或因該員催銅公出尙屬
有因亦當與戴書紳處分相同方爲平允何得意存開脫轉將原
審從輕有是理乎卽如朕辦理富勒渾一案雅德徇隱面欺通那
銀兩情節雖爲可惡然將來定案時其罪豈能轉重於犯案之富
勒渾耶劉秉恬等審辦此案殊未允當著交部分別議處○戊午
命阿桂由浙赴清口會同李世傑等辦理堵築事宜○己未諭吏
部議處御史曹錫寶參奏和珅家人劉全兒一事並不能指出實
據僅以虛詞入奏應照參奏不實降二級調用一摺曹錫寶參奏

和珅家人全兒房屋完整等情該御史如果訪有全兒招搖撞騙實據卽擬以正法亦屬罪所應得設或和珅有營私舞弊情事該御史果能據實指出參奏朕亦必質訊明確將和珅治罪乃曹錕寶第以和珅家人住屋服用完好恐有借主人名目招搖撞騙等情入奏似此虛詞朕將如何辦理耶因命留京王大臣等節次詢問伊並不能指出實據又傳彼前來行在朕面加開誠詢問亦無指實惟以杜漸防微之語搪塞夫全兒代伊主人辦理稅務多年稍有積蓄蓋造房屋數十間居住亦屬人情之常天下各處關稅其管理之員必派家人分管稅口自不免皆有羨餘卽吏胥等亦得藉霑餘潤其服用居室稍有潤飾亦屬事理所有若無剋扣侵肥情弊豈得槩繩之以法乎卽如賈誼所言絲繡偏諸天子之后緣其領庶人嬖妾緣其履彼時習俗所移卽漢文帝亦豈能執途

人而均加之以嚴刑峻法乎因細詢其必有實蹟該御史乃稱原
要和珅先事約束杜漸防微庶將來不至受人之累等語曹錫寶
無故欲於和珅前盡其忠告之言甚無謂也且朝臣相與致書論
政甚非美事韓昌黎且不能不求進況其他乎其事果有必啓門
戶黨援之端甚且並無其事而竊爲虛文以爲我曾與彼言之擾
亂國政前明之所以亡也朕用人行政一秉大公從不肯存逆詐
億不信之見若委用臣工不能推誠布公而猜疑防範據一時無
根之談而遽入人以罪使天下重足而立側目而視斷無此政體
且我朝綱紀肅清大臣中亦無攬權藉勢竊弄威福之人此所可
自信者卽如富勒渾縱容家人殷士俊等招搖婪索擁有厚貲伊
亦有勒派關口銀兩先侵後吐款蹟其負恩昧良天理昭彰無不
立時敗露朕亦不能爲之曲貸而其未經發覺以前雖以殷士俊

等家貲富厚亦斷無卽予查拏治罪之理况曹錫寶曾經派員帶同前往各大臣家人住居周厯查看其中儘有與全兒住屋相同且過之者何以獨將全兒參奏伊亦自認冒昧蓋今年爲鄉試之年伊不過欲因進摺或記其名而出差耳所見甚鄙若照部議降調亦所應得第念該御史究屬言官一時未察虛實以書生拘迂之見託爲正言陳奏姑免實降著加恩改爲革職留任並將此通諭知之○壬戌諭明史紀事本末一書係谷應泰所撰朕從前在書房時卽曾見其書以其舉有明一代之事倣袁樞通鑑紀事之體逐事貫穿始末俾覽者瞭然而逐段所論四六文頗佳茲因四庫館鈔出進呈復詳加披閱其中所載李自成攻陷京師挾太子二王東向永平吳三桂頓兵山海關悉銳出戰擊殺數千人大清兵繞至三桂之右所向披靡自成遁走三桂復率大兵追賊連戰

於保定正定西度固關入山西等語其言不足傳信當流賊攻陷京城時吳三桂以一旅偏師頓兵山海關外而賊方以太子二王爲奇貨載之馬上東行且欲招致三桂執其父襄脅令作書以誘其子其時三桂之懼賊不啻風鶴皆驚一軍膽懾其所以乞兵復仇皆藉本朝兵力及我睿親王奉命統率義師入關討賊我兵奮勇衝殺賊人望風披靡自相蹂踐自成遂棄京師西走而英親王復率師驅逐賊卽狼狽竄死 實錄所載甚明是李自成之竄敗皆係本朝滿洲兵力使三桂彼時果能辨此伊尙將攘爲己有安肯復請本朝兵力乎此自成之敗非三桂之力更爲彰明較著者也而谷應泰乃稱三桂頓兵山海關悉銳出戰擊殺數千人追奔逐北似賊人之敗於三桂而非敗於本朝谷應泰係漢人猶及明末未免意存迴護故爲左袒而非當日實在情事不足傳信著軍

機大臣詳查 開國方略所載入關殺賊實事將書中此一節重

行改正以昭正論信史○丙寅諭禮部奏朝鮮國王李祘差齎咨
官沈樂洙等赴京投咨稱該國世子李暉病故請照例備物遣官
致祭等語朝鮮國王恪守藩封歲修職貢於屬國中最稱恭順今
聞其世子李暉病故朕深爲悼惜著加恩於例賞祭品之外加一
倍賞給以示優卹該國王正在壯年亦不必過傷俟得有子嗣卽
行奏明冊封世子承續宗祧用衍國慶餘著照該部所請行

閏七月甲戌楊廷樺以疏防越獄人犯革職以錦格爲山東按察

使由鹽運使遷

○戊寅以王昶爲雲南布政使由陝西按察使遷 陳大文爲貴

州按察使由雲南池東道遷

○己卯諭軍機大臣等據常青徐嗣曾奏查

出富勒渾家人李世榮需索站規等因一摺常青徐嗣曾聯銜俱
稱奴才殊不知政體向來旗員督撫奏摺除請安謝恩外俱一體

稱臣今常青係將軍署理督篆於此等奏摺自應照例稱臣况同
爲臣僕尊親原不繫此卽稱奴才於尊君之道亦非有加至徐嗣
曾原係漢員聯銜具奏尤不應如此著傳諭常青嗣後除請安謝
恩外凡遇地方事件俱照例一體稱臣不得仍稱奴才並諭徐嗣
曾知之○以周樽爲陝西按察使山湖北
糧道遷○庚辰諭大學士伯伍
彌泰老成端謹奉職中外敷歷多年簡任綸扉兼司旗務實心宣
力倚毗方殷茲因值宿禁城陡患痰疾昇回私宅旋即溘逝深爲
悼惜著贈太子太保派散秩大臣一員帶同侍衛十員前往奠醊
仍賞給銀一千兩俾治喪事其任內降級罰俸處分均予開復所
有應得卹典著該部察例具奏○吏部議雲南巡撫劉秉恬奏南
甯縣武生尹在奇被賊搶奪誣告無辜一案請將原審覆審各員
及參奏失當之該撫分別降革諭已尼理於屬邑搶奪重案並不

虛心審理究出誣告情由輒拷訊致死無辜二命非尋常錯謬可比巴尼琿著照部議革職劉秉恬參奏原審知府知州意存軒輊實屬有心偏袒況查本內該撫從寬免其革任之案不一而足若此次再行留任則外省督撫益不知所懲儆但念劉秉恬平日尙能辦事且在京大員中籍隸晉省者甚少沈初見在出差劉秉恬著卽來京署理兵部侍郎事務所遺雲南巡撫員缺著譚尙忠補授富綱著降一級留任○辛巳諭軍機大臣等據孫士毅奏暹羅國長鄭華遣使進貢請封俟八月中旬委員伴送赴京其所稟懇恩欲在粵東置備銅甲二千領回本國防禦緬匪一節殊屬不知分量擬檄臺駁飭等語所見甚是自當如此辦理兵丁禦敵自古皆用鐵甲從未聞有銅甲之名蓋銅質本脆槍箭易入不能如鐵性之堅何以該國欲於粵東置備銅甲自係該國需用銅斤因例

禁出洋是以捏稱備禦緬匪需用銅甲以掩其迹尤屬非分干求
見已令軍機大臣將該督所擬檄稿添改發往該督即可遵照檄
諭傳示檄曰兩廣總督孫士毅檄諭暹羅國長接閱該國長來稟
遣使進貢懇請封號等因見委員伴送來使恭齋表文方物由驛
入都藉副遠悃至稱與緬匪成敵欲在廣東置備銅甲二千殊屬
非是 天朝功令森嚴銅斤例禁出洋查乾隆四十六年爾父國
長存日曾請買銅盤銅鑪等物前任督撫以事屬違例未經代奏
今請辦銅甲更非尋常器用可比國長甫經襲職尙未得受封號
宜事事小心以邀 恩眷不應忘分越請上瀆 聖聽且從古及
今俱用鐵甲該國長豈不知銅質之脆不如鐵性之堅難資抵禦
明係爾國缺少銅斤託言置備銅甲冀邀 恩允尤屬非是本部
堂職任封圻惟知恪遵成憲何敢違例代奏致干愆戾用是明白

檄知嗣後國長其益勵恪恭承受 天朝恩寵○己丑諭前因浙省倉庫虧空不能依限彌補特派大臣前往查辦並於寶光鼐奏到考試摺內批令就所聞見據實具奏此朕兼聽並觀之公心也嗣據寶光鼐節次奏到浙省倉庫虧缺浮於報明之數且將仙居縣知縣徐延翰收禁生員馬寘及平陽縣知縣黃梅丁憂演戲等款一同入奏維時朕以其不避嫌怨逐款敷陳曾於摺內批諭褒其公正迨阿桂等查明該省虧缺較之從前原報之數有減無增而黃梅丁憂演戲等款俱係寶光鼐誤聽人言實無其事朕以寶光鼐原係風聞入奏即使不實尙不欲遽加以罪而寶光鼐仍復執辦不休嘵嘵演奏且見當賓興大典多士守候錄遺寶光鼐輒置而不辦親赴平陽等處自行訪查意在必伸其說而置分內之事於廢弛是以將伊交部議處嗣據都察院會同吏部具奏以該

學政袒庇劣生擅離職守議以革職朕以寶光鼐親赴平陽等處訪查或果黃梅等實有情弊則寶光鼐前奏尙不爲無據是以將原摺暫留今據伊齡阿奏寶光鼐於未到平陽之先潛差人赴平陽一帶招集生童呈控地方事件及行抵彼處於明倫堂招集生監詢以黃梅在任款蹟生監等答以不知寶光鼐卽發怒咆哮用言恐嚇並勒寫親供鎖拏該縣書役用刑逼喝等語生監把持唆訟學政方將約束之不暇而寶光鼐招告於未到之先逼嚇於既到之後咆哮發怒紛紛若狂實屬大辜厥職若生監等因此挾制官長顛倒是非實足以長惡習而助刁風而寶光鼐執意妄行竟欲以生監等筆據爲驗是其舉動乖張瞽亂朕亦不能爲之曲庇矣寶光鼐科分較深學問亦佳從前未經升用者卽因性情偏執遇事輒挾私見是以遲遲耳近念其學問尙優歷俸最久仍用至

侍郎留學政之任理宜安分守職承受朕恩乃於浙省一案執辨不休無故陷人於忤逆名節有虧之事今復招集生監逼令指實而置目前錄科之事不辦徒令閩省生監守候多時幾誤場期如此若再姑容則何以爲曠職生事者戒竇光鼐著照部議革職其吏部右侍郎員缺著金士松調補所遺兵部左侍郎員缺卽著劉秉恬補授其浙江學政著顧學潮暫行署理今年爲更易學政之年屆期有旨另補○庚寅諭本日據御史祝德麟條奏江浙漕務水利地畝等事又徐如澍奏請將本年廣額十五名於北皿南中皿試卷內一體分派二摺朕披閱之下俱係無關緊要本年係鄉試之期近來御史奏事者頗多並非留心建白不過覲覲出差地步卽如祝德麟條奏江浙漕務水利等事不過尋常事件早何不奏必待此時條陳甚至徐如澍竟不顧科場處分條例輒行入告

其非希冀入簾而何所有祝德麟條奏雖爲無關緊要之件其是否可行之處著交該部議奏至徐如樹明知科場條例處分輒行陳奏且於摺內聲明籍隸貴州並無兄弟親戚應試等語試思徐如樹籍隸貴州卽無兄弟親戚豈無同鄉故舊及相識應試者更屬取巧徐如樹著交部議處嗣後科道等凡遇鄉會兩試屆期前一月之內係陳奏特參大員申冤理枉迫不及待者准其入奏外其有關科場事務及尋常事件一槩不准屆期違例具奏以杜僥倖陋習著爲令○諭據李世傑等奏本年黃運兩河漫口數處一切修築撫恤及善後事宜需費甚鉅請暫開捐例等語納貲授官本非善政如川運軍糧之事需用浩繁偶一行之旋即停止而自停止以來十有餘年亦未有人再以開捐奏請者方今帑藏充盈足敷供億李世傑等何必鰥鰥過計爲言利之請乎朕思金貨本

流通之物與其聚財於上毋寧藏富於民朕卽位初年戶部銀庫計不過三千餘萬兩今五十餘年以來仰蒙上蒼嘉佑年穀順成財賦充足中間普免天下地丁錢糧三次蠲免漕糧兩次又各省偏災賑濟及新疆兩金川軍需所費何啻億萬萬卽去年江南等處賑費亦至千餘萬然見在戶部庫銀尙存七千餘萬較之卽位初年已多一倍有餘朕壽已高距歸政之期屈指九年若非因上年各省荒旱賑恤所需用去帑銀一千四百餘萬兩則尙欲於此數年內設法施恩以散帑項至歸政時庫藏較卽位時自必尙有盈餘又何必於此時轉以要工費用稍爲靳惜乎况見在科目出身人員足敷任使而川運軍糧報捐之人尙有未經銓用者內外職官額缺止有此數若捐例一開正途必至壅滯有早歲登科至皓首不得一登仕籍者朕方爲寒畯疏通進身之階每屆數科

後卽舉行挑選一次又豈肯令貲郎壅其仕路乎在捐納中原未嘗無人才可用而雜流卽因之並進且博得廕仕一兩年內其所得廉俸卽可盈於所出之貲在國家並無實際適足以遂其壟斷之私於鈐政官方兩無裨益此奏斷不可行並將此通諭知之○諭富勒渾受朕深恩簡任封疆擢用總督歷練亦久資格較深是以由閩浙調用兩廣委以海疆繁劇之任乃伊竟志得意滿縱容家人長隨關通婪索營私舞弊漫無覺察形同木偶已屬知情故縱又於兼署粵海關印務時聽從家人長隨等恣憑勒令書吏豫繳銀一萬九千餘兩存貯私宅希圖侵蝕及見家人贓私敗露始奏請歸公勒結存案爲掩飾推卸之計其先侵後吐罪無可寬著依擬應斬監候秋後處決至雅德於富勒渾家人招搖婪索飢法營私各款舒常遠在隔省尙有風聞豈伊與富勒渾人在同城轉

毫無聞見經朕降旨密訪並不據實直陳且反飾詞保奏其昧良
徇隱甘心面欺情節甚爲可惡卽應照故出人罪律與富勒渾同
擬斬候亦屬罪所應得但念其僅止徇隱尙無侵貪款蹟與富勒
渾之眞贓實犯者有間雅德著加恩免其治罪從前阿桂等定擬
將浙省清查虧空案內留抵銀十三萬九千餘兩著落富勒渾雅
德福崧名下分賠歸款除雅德本應分賠之外所有富勒渾家產
已經查抄伊名下應賠銀兩卽著落雅德全數代賠以示懲儆仍
俟伊到京後再行派差贖罪以觀後效至福崧在浙江巡撫任內
尙無別項劣蹟其咎在於不能實力督催以致逾限不完又復公
堂設誓有乖政體前經加恩令其署理山西巡撫部議革任時降
旨俟富勒渾雅德定案後一併另降諭旨福崧著從寬免其革任
仍註冊俟八年無過方准開復至殷士俊李世榮借主人名目招

搯滋事厥罪維均且李世榮係富勒渾世僕尤非長隨可比何以阿桂等轉將該犯定以絞候實屬寬縱阿桂曹文植舒常伊齡阿俱著交部察議殷士俊李士榮俱著卽處絞○乙未諭本日據伊齡阿奏寶光鼐在平陽城隍廟多備刑具傳集該縣書吏追究原任知縣黃梅款蹟生監平民人等一槩命坐千百成羣紛紛嘈雜及由平陽回省攜帶多人坐船出溪河晝夜行走以致水手落河淹斃抵省時稱黃梅款蹟不是丁憂演戲乃另有呈控之案噫噫執辨並有不欲作官不要性命之言等語此事之始朕因寶光鼐爲該省學政適該省有虧空之案因令就所見聞陳奏此朕明目達聰兼聽並觀之意耳卽使所言不實亦止係風聞入奏斷不以此遽加之罪也今伊所稱黃梅丁憂演戲等款皆節外生枝况業經阿桂等審係寶光鼐誤聽虛誣朕亦並未加之譴責寶光鼐當

知感激朕恩安靜供職乃見屈賓興大典多士在省城守候錄科
伊竟親赴平陽咆哮生事而置目前錄科之事於不辦是以將伊
革職此寶光墮自貽伊戚其罪並不在乎言事不實也茲復據伊
齡阿奏寶光墮回省時攜帶丁憂典史及監生等多人以爲質證
且言不欲作官不要性命等語看來寶光墮竟係病瘋是以舉動
顛狂若此伊於黃梅丁憂演戲一節始則誤聽人言欲以忤逆不
孝之事污人名節卽赴平陽訪查此事屬虛復言黃梅任內另有
別項款蹟以實其說如此乖張蓄亂不但有乖大臣之體且恐煽
惑人心致啓生監平民人等訐告官長效尤滋事之風不可不嚴
行懲儆僅予革職不足蔽辜寶光墮著交刑部治罪○命和珅
爲文華殿大學士兼吏部尙書以福康安爲吏部尙書協辦大學
士仍留陝甘總督任福長安爲戶部尙書轉諾穆親爲戶部左侍

郎以松筠爲戶部右侍郎○戊戌諭據寶光鼐奏親赴平陽查出黃梅以彌補虧空爲名計畝派捐每田一畝捐大錢五十文又每戶給官印田單一張與徵收錢糧無異又採買倉穀並不給價勒捐錢文莅任八年所侵吞部定穀價與勒捐之錢計贓不下二十餘萬並據各監生繳出田單印票收帖各檢一紙呈覽等語前據伊齡阿奏寶光鼐回省攜帶監生多人以爲質證舉動顛狂且恐煽惑人心啓訐告抗官之漸是以降旨將寶光鼐擊交刑部治罪今觀寶光鼐所奏又似黃梅實有勒派侵漁之事且有田單印票借票收帖各紙確鑿可據豈可以人廢言前因浙省勒限彌補虧空恐該州縣中有不肖之員藉端勒派擾累閭閻屢降諭旨飭禁今黃梅借彌補而勒捐既勒捐仍不彌補以小民之脂膏肥其慾壑婪索不下二十餘萬似此貪官污吏而不嚴加懲治俾得網漏

吞舟不肖之徒轉相效尤於吏治大有關繫若寶光飛果有賄買
招告及刑逼取供各情節一經質訊得實其獲戾更重今觀其呈
出各紙此事不爲無因又有原告吳榮烈隨伊到杭願與黃梅對
質若朕惟阿桂曹文垣伊齡阿之言是聽而置此疑案不明白辦
理不但不足以服寶光飛之心且浙省見值鄉試生監雲集眾口
藉藉將何以服天下輿論此事關繫重大不可不徹底根究以服
眾懲貪阿桂見已起程在途接奉此旨仍著同至浙江秉公審辦
此時寶光飛業已由浙起解阿桂於途次遇見卽將伊帶回浙省
以便質對此案若止派阿桂伊受朕深恩爲大學士自不肯心存
迴護但究係原審之人著添派閔鶚元會同審辦閔鶚元以科目
出身久任巡撫辦事認真且籍隸浙江見聞更爲真切自當秉公
無所迴護該撫見在江甯監臨鄉試著布政使長麟馳驛前往代

理監臨事宜閱鴛元卽回至蘇州等候阿桂經過時一同馳往務將寶光鼐摺內所奏黃梅勒派貪贓各款逐一根究其稱黃梅母死緩報丁憂借演戲以便催糧似非人情所有且此案內緊要關鍵亦不止此阿桂閱鴛元總須將黃梅勒捐派累實在情形審訊明確且寶光鼐進呈田單印票飛頭穀領收帖借票各件俱係黃梅勒派勒借及採買倉穀不發價值虛填收領實在憑據寶光鼐進呈者不過每據各檢一紙其留浙省者甚多以此觀之則伊齡阿不免爲屬員所欺矣此事卻有關繫伊齡阿尚可朕與阿桂可受其欺乎必應審明朕不迴護惟有大公至正而已閱鴛元亦應如此阿桂等到彼止須就此各項字帖並調齊控案逐款根究卽無難水落石出况票內一半鈐有官印及伊私用圖記斷非捏飾黃梅如果有此種種劣蹟卽應審明定罪以儆奸貪不可顛預完

結致滋物議也將此週諭知之○庚子諭軍機大臣等本日又據寶光鼐覆奏黃梅在任匿喪三日假稱慶祝以便追糧該員在任八年虧空累累知府方林於四十九年五月曾經揭參離任後任金仁接署曾不逾月復委汪誠若接署而黃梅旋於十一月內復回原任總因空倉空庫各員不敢接收黃梅遂抗不彌補以爲自固之計巡撫福崧並無沾染是其所優而姑容劣員似失之懦弱姑息等語朕反復閱看黃梅劣款看來竟係屬實並非寶光鼐架詞虛捏而前此之再三奏辨不得謂之風聞誣陷矣如黃梅各款全係子虛則前日寶光鼐隨摺進呈之田單領借等紙尙可云出自寶光鼐捏造然捏造字蹟容或有之至於印信圖書豈能捏造卽或描畫一二紙亦斷不能造至二千餘張之多且字帖內俱有業戶花名排號寶光鼐豈能逐戶問之而僞爲填寫又豈招告勒

供之所能捏造乎此事除是田單糧票借約皆爲寶光僞假捏方可信其爲虛否則卽據確鑿黃梅將何從抵賴此事理之顯然者也朕於寶光聽因其偏執己私嘵嘵瀆奏而於阿桂等查辦虧空後復親赴平陽招告滋事並據伊齡阿兩次參奏是以將伊革職解部治罪今旣據查出田單領借等紙二千餘張則是證據確鑿朕從不迴護雖欲不查辦而不能看來竟大有關係朕不爲己甚亦不肯聽其已甚常論之語阿桂自知也卽如所奏黃梅匿喪三日假稱慶祝三日以便追糧其事出乎情理之外由今觀之貪夫之心慾壑無厭昧盡天良未必非實在情形矣朕於此事毫無成見惟以查辦得實爲主阿桂閱鄂元到彼時惟當共體朕心秉公嚴審且據寶光飛奏黃梅任內虧空疊疊經該府方林揭參後任署知縣金仁汪誠若等未肯接收黃梅旋復回任等語州縣離任

接任俱有月日可查而金仁汪誠若俱在浙省更不難就近質對阿桂等卽當提訊嚴質則黃梅之始而虧空旣而勒派勒捐捐派之後仍不彌補種種劣蹟自可水落石出矣該員在任八年借彌補之名以肥私橐甚至母死匿喪借稱慶祝以便催糧卽此二款屬實黃梅已罪不容誅而該省上司竟同龔督一任劣員如此敗檢貪婪此而不嚴行懲辦何以爲虧帑殃民者戒且竇光鼐摺內稱福崧操守是其所優而姑容黃梅是其所短亦見其持論之公如伊偏執己私卽當將福崧牽連參奏今伊所奏如此卽不得謂之欲實前奏架詞誣陷也著傳諭阿桂於遇見竇光鼐時卽傳朕旨將伊除去刑具免其拏問著卽帶往浙省隨同查辦此案並將此旨給其閱看至黃梅在任旣有贓款則伊任所私蓄必多除傳諭孫士毅等將伊原籍家產查封外著阿桂等卽將黃梅任所贓

財一併查封若其家貲豐厚則卽借彌補爲名攤派肥瘠之實據也並查伊長子究係何名逃往何處卽行緝拏提審至黃梅任內有無別項劣蹟亦著一併嚴審具奏再伊齡阿兩次參奏寶光鼐未必不受屬員懇懇此案伊可無庸會辦以免迴護

八月辛丑朔諭軍機大臣等前因寶光鼐於黃梅丁憂演戲彌補虧空等款執辨曉曉再三瀆奏且親赴平陽招告聚集生監千百成羣經伊齡阿兩次參奏摺到朕原憎其煽惑人心有類瘋狂是以節次降旨將伊革職拏問是寶光鼐在浙省咆哮多事不特阿桂伊齡阿等憎其爲人卽朕亦厭其舉動乖張汚人名節及伊前昨兩日同奏摺到將黃梅任內劣蹟逐款羅列並於生監平民等呈出捐派領借等印信圖書字帖二千餘張內每摺進呈一紙朕詳加閱看並命軍機大臣查對俱係黃梅劣款之確鑿可據者則

寶光鼐之奏並非捕風捉影撿拾誣陷已可槩見伊係硜硜自守之書生若謂於此事意圖捏造以實其言則二千餘張之印信圖書字帖必俱係寶光鼐憑空造作想寶光鼐未必有此伎倆朕於寶光鼐始則憎之而此時則覺其言之確鑿惟欲將黃梅劣蹟徹底查辦以正其罪所謂無固無我不存成見前之憎寶光鼐乃憎其所可憎今之信寶光鼐亦信其所可信也阿桂等前在浙省查辦時目覩寶光鼐多事咆哮性情執拗自爲心懷厭惡今復令其前往查辦斷不可仍執前見稍涉私嫌惟當以朕之心爲心逐款秉公嚴訊俾貪員劣蹟一一審出置之重典所謂懲一可以儆百政體國法必當如此阿桂想必與朕同心也至寶光鼐在平陽招告聚集生監千百成羣且平日固執性成閩省官吏自必皆與伊不睦伊齡阿據其稟揭卽行參奏在伊齡阿亦不無憎惡寶光鼐

之心至阿桂受恩深重爲國重臣必能通曉大義非伊齡阿之新進者可比阿桂當效朕大公無私之心前往查辦時毫無芥蒂一秉至公此案自不難水落石出矣阿桂於途次遇見寶光鼐時卽遵昨旨寬其鞫問解去刑具告以朕意帶往浙省隨同查辦並著阿桂接奉此旨卽速兼程行走朕惟計日以待也將此傳諭阿桂並諭閱鄂元知之閱鄂元亦當善體朕意也○壬寅諭軍機大臣等據李侍堯等參奏漢陽縣知縣胡金門宋維翰於縣民劉相臣搭傷余方得身死續經翻供驗明余方得實係自縊並不卽時審結犯證久禁拖累又湖南臨武營僉派把總李光斗赴省領餉中途失去餉桶代辦臨武營中軍守備事李廷璧等僉派不慎致有疏虞等語此二案俱係特成額任內之事特成額在任有年於屬員承審案件任其闕穴玩延並不卽時參奏以致案犯竊夥拖累

至營員領餉自宜小心防護乃臨武營僉派把總微弁赴省關領以致中途餉桶被竊可見特成額在任並不實力整飭一味玩延遂致文武廢弛朕若早知其如此斷不將伊調雲貴邊疆要地矣著將李侍堯摺鈔寄特成額閱看令其將因何如此諸事廢弛之處明白回奏並著自行議罪○乙丑諭近年以來各省越獄之案不一而足所謂水懦民狎正宜猛以濟寬之時且該犯等狃於法輕肆行越獄就獲後轉致身罹大辟是亦非辟以止辟之義其故由於越獄之案向來辦理並未明定專條無以示懲嗣後如有越獄人犯既逃就獲其本罪係屬斬絞應入情實者俱卽行處決如本罪係斬絞緩決者俱入於秋審情實其原擬軍流以下人犯無論原犯罪名槩行問擬絞候入於秋審緩決此非於法外有所加重蓋法輕則民易犯此等兇頑不法之徒必如此嚴立條例庶不

至輕蹈前轍著交刑部載入則例通行內外問刑衙門一體遵照辦理並著各督撫等交臬司將此旨刊刻發交各屬於監獄處所懸挂曉示俾各監犯等知越獄脫逃非特不能倖免偷生轉足自速其死庶獲罪犯囚咸知儆懼此亦刑期無刑之意所有直隸鉅鹿縣越獄一案著軍機大臣會同法司卽照此定擬具奏並通諭知之○丙寅諭向來固倫和碩公主俱乘坐銀頂轎嗣後固倫公主著乘坐金頂轎和碩公主仍著乘坐銀頂轎十公主著加恩亦乘坐金頂轎○丁卯諭阿桂等奏審擬原任平陽縣知縣黃梅向部民勒借錢文並按田科派二款已供認不諱一摺黃梅以彌補虧空爲名向部民勒借派捐業有確據其貪婪不職殊出情理之外黃梅著革職鞫問溫州府知府范思敬著解任一併質審定擬具奏○戊辰諭蒙古王公子弟有雖未及歲已賞戴花翎者卽予

應得職銜著爲令

九月丙子諭據復興等奏稱車臣汗及土謝圖汗兩部落游牧處距圍場路遠嗣後請分年更換入圍俾人馬俱得休息等語復興等所奏雖是尙有未盡之處車臣汗及土謝圖汗兩部落距烏里雅蘇台俱遠而與庫倫相近嗣後將此兩部落應習圍場之人卽交駐紮庫倫辦事王大臣等率領習圍其賽因諾顏扎薩克圖汗兩部落人仍交烏里雅蘇台將軍大臣等率領演習嗣後兩處著一年各帶一部落人入圍則伊等人馬從容且可省自游牧遠地調取往返矣將此交復興等遵照辦理再每年烏里雅蘇台將軍大臣等處輪流直班之四部落王公扎薩克台吉等原因軍營遇有事件易於調取屬人而設此係軍營舊例非演習圍場可比著復興等傳諭四部落仍舊輪班前往駐紮再自烏里雅蘇台派隨

木蘭之十名善射均係微末台吉如有職銜較大者前來朕亦可
得熟識擇其中出色黽勉者挑取乾清門行走賞給花翎黃馬褂
於伊等亦屬有益將此交復興等嗣後於各部落內自汗王至公
各揀派一人台吉內各揀派四人率領職銜較大者二名微末台
吉八名仍作十名善射輪班前赴木蘭圍場著爲令○戊寅上
駐蹕避暑山莊○甲辰錦格以疏防反獄人犯革職拏問以玉德
爲山東按察使○丙戌上自避暑山莊回鑾○丁亥諭前因浙
省倉庫虧空不能依限彌補特派大臣前往查辦並因寶光龜爲
該省學政見聞較切因令就所聞見據實陳奏此朕兼聽並觀之
意嗣據寶光龜覆奏浙屬之嘉興海鹽等倉庫虧缺浮於報明之
數並以平陽知縣黃梅丁憂演戲列款入奏朕以其不避嫌怨曾
褒其公正迨阿桂等查明該省虧缺較原報之數有減無增所參

黃梅款蹟謂係寶光龍誤聽人言實無其事而寶光龍執辨不休且據伊齡阿兩次參奏寶光龍自赴平陽招集生監逼寫親供咆哮生事其時朕以此案業經阿桂等審明寶光龍固執己見聚集生童招告恐煽惑人心致啓訐訟之風寶光龍不得爲無罪是以將伊革職拏問此政體國法必當如此辦理非朕之愴寶光龍也嗣據寶光龍將黃梅貪贖款蹟逐一查出並將借票捐單呈覽賊款鑿鑿是其言並非無據而阿桂等前次在彼查辦竟爲地方官瞞過伊齡阿又復聽信屬員一面之詞受其慫恿遂爾冒昧參奏不可不徹底根究因卽降旨將寶光龍寬釋並令阿桂帶同寶光龍回至浙省並派閔鶚元會同前往查辦茲據阿桂等將黃梅在任婪索各款嚴切審訊黃梅勒借吳榮烈等錢二千一百千文侵用田單公費錢暨朋貼採買錢一萬四千餘千文而於原報虧缺

穀價僅彌補四千餘兩仍未依限補足是寶光鼐所奏惟黃梅陸
喪演戲及侵用廩生餽糧並短發老民銀兩三款屬虛其餘三款
已爲確實是伊從前冒昧固執之咎尙屬可寬見在陸錫熊已出
學差所有光祿寺卿著加恩令寶光鼐署理卽行來京供職至黃
梅於乾隆四十三年調任平陽在任八年種種貪黷營私歷任上
司漫無覺察實難辭咎但四十三年以後督撫如王賈望陳輝祖
俱已另案治罪法無可加惟福崧在巡撫任已歷數年乃於此等
劣員畝法侵貪並不據實參奏豈可復膺封疆之任前任藩司盛
住所屬州縣錢糧是其專責伊在浙較之福崧尤爲最久亦復置
若罔聞姑容闕冗是盛佳亦不應仍任織造伊等見交部嚴議自
係革職難邀寬宥福崧盛佳先著革去翎頂俱著來京候旨所有
山西巡撫員缺著勒保補授勒保接奉此旨卽赴新任不必來行

在請訓其杭州織造著額爾登布去至伊齡阿於黃梅婪索一案雖非其任內之事但聽屬員之言兩次將寶光薰冒昧參奏是其錯謬伊已自請交部嚴加議處著在任聽候部議其餘失察之各上司俱著交部查取職名分別嚴加議處朕辦理庶務一秉大公至正總期案情覈實從不稍存成見及諸臣功過惟視其人之自取除將阿桂等審擬一摺交軍機大臣會同行在該部覈議具奏外將此通諭知之○戊子諭福康安見於十月內起程來京陛見永保著署理陝甘總督印務俟福康安回任後永保卽前往塔爾巴哈台辦理參贊大臣事務換慶桂回京其陝西巡撫員缺著巴延三補授○諭上年刑部堂官喀甯阿等於審訊海昇致死伊妻吳雅氏裝點自縊一案意存瞻徇是以降旨將伊等降爲四品頂帶以示懲儆今事隔經年該堂官等奉職尙屬勤奮且辦理本年

各省秋審案件亦俱覈擬妥協喀甯阿胡季堂穆精阿姜晟俱著
加恩復還原品頂帶○諭昨阿桂閱奏元奏寶光鼐事已經降旨
今復思之浙省倉庫虧空未能依限彌補特派阿桂曹文植姜晟
伊齡阿先後前往該省徹底查辦伊等自應將各州縣虧空實在
情形及有無借彌補爲名藉端勒索侵肥之事詳晰查究據實參
劾方不負委任之意何得止憑地方官結報就案查覈遽爲了事
卽如黃梅貪黷營私贓款纍纍實由借彌補虧空爲名侵漁肥橐
而於原報虧短穀價僅彌補四千餘兩仍未依限補足阿桂等從
前查辦時卽應將此等情弊詳悉訪查切實根究方足以服眾懲
貪豈黃梅種種婪索之事乃在虧空本案之外耶卽使案外之事
欽差大臣猶當查辦何況案內之事乎阿桂等以該省虧缺較原
虧之數有減無增卽謂可以完案而於黃梅借端派欵各弊並不

虛心察訪若果如此則此等案件止令督撫等照常查訊由地方官出結具詳已可完案又何必特派欽差前往辦理今因竇光鼐將黃梅借票田單查出據實具奏經朕復令阿桂會同閔鶚元前往覆審並再四申諭令阿桂毋得稍存迴護芥蒂之見始據阿桂等將黃梅在任勒借部民錢文及侵用田單公費朋貼各款據實審出試思此等情弊非從前阿桂等遺漏未曾查出之事乎阿桂等此次查審時如竇光鼐所參黃梅各款俱涉虛誣尙可藉口今既審實則阿桂等豈無應得之咎乃並不自行檢舉且竇光鼐所參黃梅款蹟雖有三款審實但前此查辦黃梅時節據伊齡阿等奏稱竇光鼐嘵嘵執辨咆哮生事並有不要性命不要作官之語亦殊乖大臣之體又稱黃梅母死演戲家人竊物外逃透漏信息並逼令典史李大璋書寫呈詞以爲證據今已審明並無其事是

寶光鼎亦不得爲無過是以見在止令署理光祿寺卿若無此等情節朕必將伊仍以侍郎補用矣阿桂等定案時亦應將寶光鼎所參黃梅款蹟雖已審實而從前性情偏執舉動乖張不合之處分晰陳奏乃並未經議及可見阿桂等始則因寶光鼎堅執多事心懷憎惡及事已審實則又妄意朕曲護寶光鼎不復置議尤屬非是使阿桂等於寶光鼎嚙嚙爭執時果能虛心採納從此訪查則黃梅款蹟未必不早經得有根據矣况阿桂口侍禁廷甯不知朕辦理庶務惟期覈實從不稍存愛憎成見卽下至匹夫匹婦亦不肯使之稍有冤抑豈於大臣轉有所愛憎於其間而不爲之辨白耶又黃梅調任平陽在任八年贓私累萬其歷任本管道府瞻徇袒庇並不揭參本省撫藩亦俱置若罔聞非尋常失察可比其罪甚大設各省效尤國政尙可問乎是以降旨將福崧盛住俱行

革任阿桂等定案時自應將各該上司道府等查明嚴行參奏乃僅於摺內照常請交部查取職名分別嚴議此一節阿桂等亦難辭瞻顧迴護之咎但朕意不爲已甚故如此完案耳至閔鶚元因其本係刑部司員出身且久任巡撫辦事尙爲認真是以令同阿桂前往此案旣經審出實情卽應將阿桂等原審未實之處附摺參奏否則亦應於定案具奏時將此一節提知阿桂令其自行請罪方爲不負任使乃亦默無一言隨同列銜具奏閔鶚元係封疆大臣又非隨出司員何得委隨若此應交部議處至伊齡阿於寶光僱冒昧參奏及今案情審實其自請議處摺內止以不應參奏寶光僱爲詞而於從前審辦失察之處亦無一言引咎豈伊齡阿獨非原審之人耶阿桂曹文植姜晟伊齡阿俱著交部嚴加議處朕臨御五十餘年壽逾古稀猶日夜孜孜批覽奏摺事無鉅細無不

準情酌理處以大公阿桂等豈於此等處忽而不察可以將就完案遂將顛預混過耶將此通諭知之○賞福崧二等侍衛赴和闐辦事盛住主事銜交伊犁將軍奎林差遣○命嗣後駐藏大臣等所兼京缺不必開○調蘇凌阿爲倉場侍郎

由工部右侍郎調

○壬辰

上還京師○甲午以綽克托爲戶部尙書○乙未論上年海昇陞死伊妻吳雅氏裝點自縊一案刑部司員葉成額李闊檢驗不實特派刑部侍郎景祿杜玉林帶同司員王士棻慶興等前往檢驗該堂司官以海昇係阿桂姻親意存瞻徇復派侍郎曹文植伊齡阿覆審始究出致死實情因降旨將有意迴護之堂司各員發往伊犁效力贖罪以示懲儆實屬咎無可寬今思阿桂係滿洲大臣景祿慶興葉成額等俱係旗員逢迎瞻顧自所不免漢堂司官不過隨同附和緘口不言而已且旗員在新疆地方該將軍尙可各

處差委漢員在彼亦不能得力姑念杜玉林等於刑名事件平日
尙能熟習除景祿慶興葉成額仍留伊犁當差外杜玉林王士葵
著加恩釋令回京交軍機大臣帶領引見再降諭旨至李閣係此
案原驗之員因素與海昇認識輒授意件作令其捏報所謂罪之
魁也非僅如王士葵之扶同徇隱者可比雖同係漢員情節較重
仍不准釋回○諭畢沅江蘭王昶雖俱經朕降旨各加升擢但河
南伊陽戕官首犯秦國棟及大名滋事案內首犯段文經徐克展
俱日久查拏未獲可見該撫等緝捕並不認真尙何顏復膺升擢
著遵前旨責成畢沅江蘭專心查緝若不能拏獲要犯畢沅不准
前赴湖廣新任江蘭亦不准遽卸藩篆來京陛見儻秦國棟經別
省拏獲畢沅等俱不能辭咎至王昶係隔省臬司經永保派委在
商州潼關一帶督飭查拏卽秦國棟別經拏獲亦於王昶無涉尙

可來京陛見再赴新任江蘭則前經專派伊緝捕要犯秦國棟段文經等至今查拏日久尙無一名就獲乃並不在彼盡心設法根緝竟奏請陛見榮膺升任覲顏以巡撫自居試思要犯久稽顯戮並不能實力躡獲尙有何顏面前來覲見亦何顏忝居顯職耶江蘭並非才具出眾別有出力之處不過因其上年查辦災賑事務不辭勞瘁尙屬奮勉是以加恩將伊擢任巡撫乃竟志得意滿輒思養尊處優不以緝捕要犯爲事甚屬非是江蘭著交部嚴加議處至畢沅素係賤事之人江蘭卽欲來京亦應阻止乃竟代爲陳奏亦屬不合畢沅著交部議處○諭前因山東省監犯單大經等脫械越獄時東南二監房禁犯俱安靜未動特令該撫查明各犯名姓案由及原擬罪名分晰咨送本日據軍機大臣會同刑部將明興開送單內分別情罪酌擬減等具奏朕詳加閱定已依議行

矣因查山東省除越獄已經正法之單大經等及尙知畏法分別
加恩減等之李倫等此外尙有情實應行予句之犯二十三名尙
以秋審人犯擇其情罪重大者於秋審時即將各犯羈禁司監不
必發回本處原爲慎重起見本年直隸山東二省有越獄之案內
而御史劉紹錦外而總督李世傑保甯輒紛紛條奏多以留禁司
監人犯眾多爲未便試思秋審人犯若果俱存留司監則今山東
省何以尙有應行予句不在司監者二十二人之多可見外省辦
理此事竟屬參差並不畫一上下通同虛詞掩飾已可槩見無一
實心任事者實爲愧慚殊不知直隸山東皆由於平日怠玩廢弛
不能上緊稽察以致有越獄脫逃之事若如輿論以爲司監犯多
所致則直隸山東二省外尙有十餘省又何以俱無此等越獄之
事耶地方事務總在各督撫等實力實心認真辦理苟不如是蚩

蚩愚民何事不可爲耶將此通諭知之○諭前據阿桂等審擬黃梅焚索一案業經節次降旨並將阿桂等交部嚴加議處矣今思伊齡阿於黃梅種種勒派貪婪雖非伊任內之事但曾經參奏寶光鼐未到平陽之先卽差人先赴平陽招集生監呈控及抵平陽後當堂詢問生監等以黃梅在任款蹟生監答以不知寶光鼐卽發怒咆哮又續奏寶光鼐詣該縣城隍廟令該縣多備刑具傳詢書役因鎖拏書役未到發怒咆哮等語伊齡阿於寶光鼐親赴平陽招集生監逼寫親供咆哮生事之處則屢經查出參奏而於寶光鼐所奏黃梅在任勒借部民錢文及侵用田單公費朋貼各款豈竟毫無聞見何以不能查出况借票田單證據確鑿一經訪察無難得實乃竟置之不言豈伊齡阿但能訪查寶光鼐而不能訪查黃梅乎卽使所奏寶光鼐情節係溫處道張裕穀等官官相護

聯爲一氣率行裝點扶同具稟伊齡阿爲其所蒙蔽然爲督撫者
釐奸剔弊是其專責豈舍此張裕穀等數人之外別無可寄耳目
又何以察吏安民耶總之伊齡阿因竇光鼐屢次嘵嘵爭執心存
憎惡成見一聞屬員之言不察虛實遽行參奏而於黃梅則不免
意存贈徇雖有侵貪款蹟亦置若罔聞以爲前任旣已辦過若再
明辦恐累及前任卽此意見豈可復膺封疆之任見在交部嚴加
議處應聽候部議惟念伊係內務府人員歷任關差於榷稅事務
尙爲熟悉況和珅於乾隆四十三年兼管崇文門監督迄今已有
八載見任大學士亦不便兼理榷務從前曹錫寶參奏和珅家人
全兒一事未必非因此而又不敢直言亦可鄙也伊齡阿著來京
在總管內務府大臣上行走並兼管崇文門監督所有浙江巡撫
員缺著琅玕補授長麟著補授刑部侍郎英善著調補江蘇布政

使所遺湖南布政使員缺著郭世勳補授其湖南按察使員缺著
恩長補授○己亥 皇長孫貝子縣德薨諭縣德阿哥病逝可悼
著加恩賞銀二千兩辦理喪事准其靈柩進城

冬十月辛丑朔諭據李侍堯等參奏前署孝感縣知縣秦樸任內
有縣民劉務孝劉金立烏老么等因上年歉收乏食各攜器皿向
本處村民及伊等族姓借貸糧食不遂即將穀麥等物搬搶旋有
並未被搶之革生梅調元慮及被累令伊子梅應奇邀同楊維智
及各村居民劉成烈等公立議單派人防守先捉獲劉大么等四
人緝至僧寺拷問逼令各報同夥姓名卽著多人分途捉獲張又
詠等一十九人梅調元父子起意商同劉成烈等於本年三月初
十日主使村民將兩次捉獲之劉大么張又詠等二十三人活埋
於本家山地內並將劉金立等房屋燒毀經巡檢袁學啟稟報該

署縣秦模並不查拏亦不通報請旨革職嚴審等語此事大奇殊
出情理之外上年湖北省被旱成災朕軫念災黎疊經降旨蠲賑
兼施該督撫等於賑恤事宜開銷帑銀至五百餘萬兩朕因該督
等查辦尙屬認真曾經降旨交部議敘乃督撫以及布按不能實
心督率各屬妥協料理俾災氓均霑實惠以致有貧民乏食搶奪
米糧之事其被搶居民理應呈報官爲辦理乃該處劣衿竟敢利
眾逞兇活埋生命至二十三人之多似此兇殘不法何事不可爲
乃該署縣秦模經巡檢稟報既不嚴速查拏並不通行詳稟有心
諱匿而該管道府及藩臬督撫等亦俱置若罔聞竟同壘贖是該
省吏治闕穴廢弛已極此事較之直隸大名逆匪糾眾戕官一案
更爲駭異大名匪犯滋事卽經該督據實奏報查拏尙不敢扶同
蒙隱至此事則竟通同諱匿置重案於不問且此外又有李谷祥

等將堂兄李通亨等七命一併細埋而梅調元於埋斃多命之後
慮及官司查究輒令劉金立捏造書寫白布名單內開七十五人
有同心竭力誓同生死字樣並滴灑雞血誣死者以歃血訂盟之
據其居心更屬狡險如此兇徒竟得漏網地方大小官員所司何
事此而不嚴加懲創督撫等無所敬畏因循怠玩其流弊伊於何
底將何以整官方而飭吏治耶除湖北巡撫吳垣僥倖已經病故
外特成額在湖廣總督任內諸事廢弛屢經飭諭令明白回奏其
咎尙輕此事則更在情理之外若再姑容無所示儆況重貴係邊
疆重地尤非湖廣可比特成額著革職拏問交刑部治罪永慶王
廷燮於此等重案不行查辦亦難勝藩臬之任俱著革職拏問交
刑部治罪所有著孝感縣事漢川縣知縣秦樸著革職交刑部治
罪其該管道府交李侍堯查明係何人在內之事一併革職拏交

刑部治罪巡檢袁學激既經稟報著送部引見近年各省督撫遇有交部議處降革之案朕因一時乏人多有從寬留任者伊等習以爲常不知儆畏此卽水懦爲朕之咎此案不得不嚴加整頓矣大名滋事一案首犯段文經徐克展迄今未獲山東省兩次越獄要犯尙有八名未經就獲劉義明興俱應照部議革任河南戕官一案正犯亦尙未獲但念該督等見在督率各屬設法查拏未便遽易生手劉義畢沅明興江蘭等見經部議革任革職降調之處俱著暫行留在俟將來各犯有無拏獲定案完結時再降諭旨所有雲貴總督員缺仍著富綱調補富綱前經奏准來京陛見八月初九日自滇起程計此時自已行至河南附近直隸一帶接奉此旨著卽速兼程來京候朕將地方應行整頓事件面加訓諭再行速回雲南本任常青著卽補授閩浙總督此次懲創之後各省督

撫務宜各知戒懼實心實力整頓地方毋負委任至意勿謂恩眷可以長恃留任可以屢邀也將此通諭知之

常清由福州將軍遷

○以陳淮

爲湖北布政使

由甘肅按察使遷

雙鼎爲湖北按察使

由廣東嘉道

○王寅

諭昨據李侍堯等參奏孝感縣革生梅調元等糾眾逞兇活埋多命地方官諱匿不辦一案已明降諭旨將特成額等革職交刑部治罪矣昨年湖北荒歉已發五百餘萬帑金賑恤若地方官辦理得宜何至尚有搶掠之事卽以爲發帑不足用何妨再請朕豈惜而不與乎此必有貪官污吏侵冒其間以致饑民有不受實惠者耳所關甚大亦甚可惡且乏食貧民向各鄰族借貸亦情理之常但不得邀約多人強行搶取如有此等案件理應報官究治以儆其餘乃梅調元父子並未被搶特以家擁厚貲恐致將來受累輒敢糾約劉成烈等同日細埋二十三命之多屍身多有毆縛傷

痕骸骨俱有悶蒸血暈甚至絕人父子慘及無辜似此殘忍不法
何事不可爲乃經巡檢袁學激稟報該署縣秦模並不查拏亦不
通報有心諱匿而該管道府及藩臬督撫等亦俱置若罔聞試思
此等大事一省之中豈無風聞諉爲不知是何心也幾至兇徒漏
網多命含冤李侍堯等到任後據署知府王希曾查出稟報卽派
委大員前往查辦拏獲兇犯多名起出屍身皆有憑據據實參奏
具見留心認真整頓地方甚屬可嘉李侍堯李封俱著交部議敘
至此案雖係該署縣心存隱匿未經稟報然爲督撫者安民察吏
是其專責所屬有慘殺多命之案且孝感距省不遠豈無聞見乃
竟同龔隤形如木偶若以州縣未經稟報卽諉爲不知則朕日理
萬幾於民隱無不洞悉且伊犁雲南不啻數萬里朕亦付之不問
不知可乎卽如大名逆匪滋事一案劉戡一聞稟報卽具摺奏聞

親往查拏特因首犯未獲交部嚴議特成額等之廢弛怠玩更出情理之外是以俱行革職拏問設湖廣亦有此等戕官重案亦將隱匿不報矣督撫受朕恩眷委以封疆重寄豈徒令其養尊處優而於地方重案一切置之不問又安用此督撫爲耶特成額於湖廣總督任內諸事闕冗而此案則獲罪更重是以嚴加懲治在外閒無識之徒見李侍堯屢次查參該省事件未必不以爲有意按尋欲覬覦實授總督之任督撫等前後交代如果心存傾陷有意參劾者其隱微亦難逃朕洞鑒似此不法重案儻李侍堯等瞻顧特成額情面不行查辦將來別經後任發覺則李侍堯李封俱係曾經獲罪棄瑕錄用之人更非特成額可比將首領不保李侍堯等安敢爲特成額迴護而不據實入告耶李侍堯等此奏豈得謂之過事吹求乎朕於諸臣功罪輕重悉視自取真偽難逃照鑒此

皆五十餘年來天下臣民所共見共聞者而近來恐因老而或疏於志所爲猶日孜孜益加精勤以待歸政以保末路想眾人亦無不知也著將辦理緣由再行明白通諭知之○諭前因大名滋事首犯段文經徐克展及河南伊陽首犯秦國棟俱日久查拏未獲又山東省兩次越獄要犯尙有八名未經就獲劉義舉沅明興江蘭等俱應照部議分別降革因念該督等見在督率各屬設法查拏未便遽易生手另尋頭緒是以降旨將該督等俱從寬暫行留任第該督等平日既不能整頓以致釀成此等案件又不能實力偵緝俾要犯卽時弋獲尙復何顏坐享豐厚徒忝素餐所有直隸山東河南三省督撫潘鼎新補人員外俱著停其養廉不准支領此案查拏日久至今並無一名就獲可見外省緝捕惡習全不認真若不予以嚴限恐該督撫等仍生怠玩視爲海捕具文以致

要犯遠颺漏網殊屬不成事體此案著定以本年十二月底爲限該督等若能上緊跟緝於限內拏獲尙可邀恩開復儻不能督飭所屬實力躡緝俾要犯逾限不獲是該督等自干咎戾朕亦不能再爲曲宥所有此三省之督撫藩臬等俱著吏部於年底查明屆期請旨○以祿康爲內閣學士

由給事中遷

景安爲甘肅按察使

由山西河

東道

○癸卯諭朕愛養黎元勤求民瘼各省偶遇地方偏災一經

奏報卽降旨蠲賑兼施並屢諭該督撫實心實力督率各屬妥協辦理不惜千百萬帑金務俾災黎均霑實惠此朕五十餘年如一日亦天下臣民所共見共聞者上年湖北荒歉已發五百萬帑金賑恤若地方官辦理得宜何至復有貧民乏食搶奪糧食之事乃劉金立等因借貸不遂輒將穀麥搬搶而劣衿梅調元父子竟敢糾眾逞兇活埋多命此必該督撫司道並不認真查辦一任貪官

汚吏浮冒侵漁以致朕恩不得下逮閭閻乃有饑民乏食搶奪滋
事及釀成重案之後大小各員恐從此究出弊端遂爾通同諱匿
聯爲一氣吏治如此實出情理之外試思活埋三十人俱經起出
屍身尙有毆縛傷痕及悶蒸血暈證據確鑿是豈李侍堯等所能
捏造者而籍隸湖北之御史等並無一人奏及科道爲朝廷耳目
之官該省閭閻疾苦及官吏侵貪諱匿命盜各事理應據實直陳
方爲不負言職今湖北省竟有此不法重案本省輿論本省職官
必有風聞該員等家信鄉親中豈無言及而得諉爲不知可乎若
該科道等能將此事利參朕必深爲嘉獎斷無迴護總督特成額
之理乃緘默不言而第摭拾浮詞毛舉細故如曹錫寶參奏和坤
家人全兒一事以下賤奴僕委辦崇文門稅務藉需餘潤有數十
閒住屋於國計民生有何關繫卽見在查抄特成額家產其家人

黃永等名下俱有房屋貲財典當價值累萬該御史又何以置之
不問耶所有未能參奏湖北一案之御史許兆椿著交部議處其
餘各省有無似此重大案件而地方官諱匿不辦者著軍機大臣
傳詢各科道令其據實直陳朕必嚴加懲治儻各科道因朕有此
旨遂心存挾制本省督撫致令地方諸事掣肘亦難逃朕洞鑒一
經查出亦必重治其罪將此通諭知之○丁未諭據永保奏接據
商州營遊擊張濯商州知州杜錡稟稱於柿坪地方拏獲首犯秦
國棟伊子秦周兒二犯見已委員星往迎提解省審辦屬實等語
秦國棟係伊陽戕官案內逆惡首犯逃竄日久今經永保督飭所
屬文武員弁於商州地方拏獲甚屬可嘉永保著交部議敘所有
拏獲該犯之遊擊張濯知州杜錡俱屬出力著永保將該二員一
併送部引見並查明究係何人首先拏獲或係兵丁聞信抑係捕

役訪拏之處據實查明覆奏同日畢沅又奏稱據河陝道王鑾等稟報馳赴商雒協同商州營遊擊等查至劉嶺地方將秦國棟並伊子秦周兒一併拏獲等語秦國棟一犯實係陝省兵役盤獲業經永保提解至省訊得確供而豫省委員王鑾等尙覲顏據爲伊等拏獲希圖避罪邀功實屬可鄙前據畢沅奏豫省委員毛師沅在亳州地方盤獲徐克展一犯經該州王家幹截留帶回州城因該州攘奪爭功最爲外省惡習業經降旨令書麟查參今畢沅復蹈此轍自係該委員捏飾稟報希冀爭功並著畢沅一併查明據實參奏至秦國棟糾眾拒捕竟敢戕殺知縣實屬罪大惡極乃竄匿稽誅至三月之久畢沅江蘭督飭所屬文武員弁設法偵緝購獲追拏終未得該犯實在下落今經鄰省盤獲究係豫省緝捕不力畢沅江蘭豈不知愧何顏覲邀升擢畢沅著仍回河南巡撫本

任江蘭仍回河南布政使本任畢沅江蘭仍著交部議處至李侍堯歷任封疆三十餘年才具幹練素能辦事前於雲貴總督任內收受銀廠陋規及屬員銀兩是伊志滿器盈所致是以嚴加治罪定以重辟嗣因撤拉爾逆回滋事乏人任使而李侍堯才具究屬可用復畀以陝甘總督之任令其戴罪自贖自在事以後地方諸事尙能整飭後因逆回田五不法滋擾地方李侍堯辦理乖謬擒捕遲緩復獲重譴但伊於軍旅本非所長且經朕屢次嚴諭督飭之後尙能愧奮親歷戎行帶同滿兵打仗尙有漢軍舊家風氣究與庸懦畏葸者有間是以加恩寬釋重加錄用令其署理部旗事務夏間湖北呈控該地方官侵蝕災賑一案派令前往查訊審辦俱屬允當適因湖廣總督缺出卽令在彼署理李侍堯自署督篆以來將該省積年未結盜案及孝感縣搶掠活埋多命諱匿不辦

之案查出據實參奏具見留心整頓知過認真且見在各省巡撫
內非資格尙淺卽係才具難勝總督之任者一時乏人所有湖廣
總督員缺卽著李侍堯補授李侍堯屢獲重愆今又破格棄瑕錄
用此朕不得已用人之苦心李侍堯當知感愧奮勉痛改前非嗣
後倍宜潔清自矢正己率屬於地方諸務實力整頓毋謂已補實
缺始勤終怠致負委任至意儻該督不知儆省心存滿足以致再
蹈愆尤必當加倍治罪斷不能再爲曲貸也○己酉實授李承勳
江西布政使○庚申諭向來督撫大臣中營私飢法貪縱婪索者
惟王賈望奇貪殃民是以卽行正法其餘因其曾爲大臣止賜令
自盡不忍肆諸市曹而其中情罪原本可不至予句者亦必先期
降旨免其綁赴市曹不令與眾因爲伍此朕明罰敕法中仍寓養
恥之道也富勒渾於督撫中資格較深歷練亦久是以由閩浙調

用兩廣委以海疆繁劇重任以爲將來能勝任陝甘總督者尙無
出其右今春舒常回京於五臺途次偶爾詢及舒常卽稱富勒渾
操守不敢深信朕猶疑信兼半初不料其有貪婪侵隱欺蹟也又
值穆騰額來行在陛見復經面詢據奏富勒渾操守平常且有不
能約束家人之語令軍機大臣詳加詢問方將伊家人長隨在外
居住招搖生事情節指出夫以封疆大臣其聲名操守之平常經
兩人具奏不謀而合則其言必非無據朕若置之不問又何以肅
吏治而儆官邪是以密諭孫士毅據實查奏彼時和珅卽在朕前
奏稱不如將富勒渾調回徐行查察卽可不至遽興大獄是和珅
未免意存消弭爲迴護富勒渾地步及孫士毅節次查奏富勒渾
縱容家人殷士俊等開通婪索招搖舞弊富勒渾漫無覺察已屬
形同木偶且家人贓蹟纍纍家私巨萬焉得委爲不知又因點派

各口岸令書吏攤繳銀一萬九千六百餘兩交收入署豫備賠補
關稅迨事已敗露始行奏請歸公明係本欲希圖肥橐先侵後吐
試思管理關務各員豈有先斂銀入己而藉口爲將來短少彌補
之地有是辦法乎及派阿桂前往審訊定案時止稱豫先奏明於
先侵後吐之處並未切實根究而又於家人擬罪失之寬縱且富
勒渾在粵時經孫士毅參奏後朕諭令查訊卽係特派之人富勒
渾身爲大臣理應安分待罪聽候質訊乃敢咆哮剖辨悖戾之氣
形諸詞色並有我若得罪合省官無一得免者此何言耶是今日
富勒渾之隨同眾囚綁赴市曹者實阿桂和珅心存迴護有以釀
成而亦富勒渾之罪由自取自不顧顏面朕尙爲存其顏面乎然
究念其非賣官鬻爵貪黷不法且歷任封疆宣力有年尙知奮勉
而當金川用兵時督辦糧務亦有微勞是以從寬免其句決仍半

固監禁富勒渾才具本不如李侍堯且性情剛愎將來斷不能復
思又邀錄用令其待罪固圖愧悔思過朕敬思 皇考世宗憲皇
帝臨御十三年綱紀肅清內外臣工亦俱小心惕厲其時封疆大
臣以奸貪犯法者止年羹堯一人朕御極五十餘年未嘗不時時
以整飭官方爲務而貪縱亂法如恒文蔣洲良卿方世儒王亶望
國泰陳輝祖郝碩諸人接踵敗露此皆朕水懦民玩而用人不當
未嘗不引以自愧嗣後各省督撫務宜整躬潔己嚴肅馭下以前
事爲戒設有不知儆懼仍蹈覆轍一經敗露朕必執法重懲毋謂
寬典可以倖邀朕恩可以長恃也將此通諭知之

十一月壬申 上幸瀛臺召見 諸皇子軍機大臣等諭曰人君
者天之子當以敬天勤民爲首務方可以承昊貺而迓鴻庥設於
對越之事心生懈怠不能敬謹將事是不成其爲天之子而昊蒼

亦斷不錫之嘉祐也朕臨御五十一年以來恭遇 郊壇大祀無
不祇肅躬親冬至 南郊親詣五十一次上辛 祈穀親詣四十
九次惟乾隆五年及四十九年因朕躬偶爾違和遣皇子親王恭
代而當臨祀時一切儀文典禮悉本誠恪之心恭中虔敬以期昭
格近來雖年逾古稀竄志 明禋益勤勿懈是以仰蒙 上蒼鑒
朕忱悃得有期頤之壽精神強固猶日孜孜萬幾親理於 郊祀
大典俱能肅將裸獻升降周旋勿愆於儀竊維 上天如此篤眷
惟有益懋寅恭豈忍以年壽已高稍耽安逸致精意或有未孚世
世子孫續緒膺圖若能以朕之心爲心無刻不以敬 天爲念於
郊壇大祀嚴恭寅畏盡敬盡誠自亦必仰邀 昊穹眷顧錫以
大年寶我大清億萬載無疆之床儻不能懷承朕志永矢虔恭稍
存怠忽卽朕之子孫 天亦斷不錫之以福也向來致祭 郊壇

於壇之二成設有幄次以備拜跪行禮迎神上香進爵供胙
上壇行禮畢仍回降至拜次嗣因朕年屆六旬恐精力不能如
前將亞獻終獻飲福受胙諸儀改於壇上讀祝位次行禮以節
登降之勞仍不至或愆儀節此朕因欲每次躬親祀事是以稍從
簡易非敢於郊祀大典存耽逸之見也惟念將來朕春秋日高
誠恐步履或稍遜於前意欲於壇上讀祝拜位添設小幄次一
分俟朕年至八旬卽於此內行禮設此二三年中遇風雪迺寒亦
可稍資蔽禦如果仰邀上天眷佑仍能精力如舊至八旬而不
衰尙必照常行禮所有添設幄次原可備而不用著軍機大臣會
同工部太常寺敬謹詳勘將應添幄次尺寸比二成之幄次收小
酌擬呈覽再行備辦此非朕之敢萌逸念也蓋郊祀大典獨潔
躬承惟期誠意感孚虔申寅恪儻因儀節繁重或致精力不勝勉

強將事或令人恭代則於精一凝承之意轉有未盡此後 郊壇大祀朕必歲歲躬行至八十六歲歸政時始終勿懈以伸朕敬

天法 祖之志我子孫若能繼承無斁方可永膺 洪貺垂裕萬

年矣尋議查 天壇二成原有拜次一分面寬一丈五尺見擬添

設拜次而寬九尺搏小一尺七寸原頂高八尺八寸見高七尺五

寸搏低一尺三寸候命下交工部敬造並交太常寺候屆 大祀

應否妥設請旨行得旨添設拜次著照二成原有拜次面寬搏小

七尺進深搏小二尺頂高搏低二尺五寸著用金黃色餘依議○

諭見今貝子繇德應降一等將伊子奕純封爲鎮國公但從前和

親王薨逝後伊子永璧未曾降等仍令承襲親王而繇倫薨逝後

繇循亦未降等仍令承襲郡王今繇德係朕長孫而奕純又係朕

之長曾孫若拘泥成例令其降等襲封似朕有意不令承襲奕純

著令仍襲封貝子不可爲例將此通行曉諭宗室等俾知朕意○
添設河南同知一員分管蘭儀睢三汛工程○戊寅免新疆屯練
民戶未完五十一二年應徵牛價口糧○庚寅諭據永保奏莊浪
土司魯璠見隨年班伯克入覲請酌給驛馬赴京等語魯璠係內
地土司來京朝覲雖向無乘騎驛馬之例但該土司曾在軍營頗
爲出力且見隨年班伯克行走若令自雇腳力未免拮据魯璠著
加恩准其一體乘驛並著沿途支予廩給不拘該土司行至何地
接奉此旨卽行支給仍照例沿途妥爲照料俾與年班伯克一同
抵京嗣後該省各土司有情殷瞻覲者俱照此例賞給驛廩以示
體恤○己亥諭前因各省承緝金川逃兵屢經展限覈其拏獲及
自行投首者仍屬寥寥因降旨將承緝接緝督緝之文武員弁俱
著革職留任分別年限方准開復限內准調不准升用原因外省

於查緝要犯全不認真不過以海捕具文因循塞責不得明定處分俾該員等稍知儆惕以完此案第念自查緝以來各省俱有拏獲及自首者而承緝督緝之文武官員望議停升者甚多此內不無可用之才若因礙於處分不得升用亦覺可惜且歷時已久所有此案各省承緝接緝督緝逃兵之文武官員處分俱著加恩寬免此朕愛惜人才恩施格外之意嗣後各該地方文武遇有查緝事件倍當認真毋謂恩澤可以屢邀處分可以倖免仍不改海捕因循陋習以致自干重戾也夫兵可百年不用不可一日不備行軍之道全在紀律嚴明信賞必罰八旗滿洲索倫從無一人逃匿者綠旗兵丁皆國家豢養之人亦應知效法知羞恥矣此皆由領兵將弁平時不能訓習使之有勇知方及至臨事又不能嚴加約束所致其咎甚重而將軍參贊領隊以至偏裨將領雖有專統

之分俱任領兵之責反得置身局外豈爲情理之平自當按照逃兵多寡分別專轄兼轄統轄定以處分且兵丁自軍營脫逃後帶兵員弁勢不能舍敵懷而親自追拏其經過及原籍地方文武各員理應實力查緝儻逾限不獲亦有應得處分應較親身領兵之員稍示區別不至畸重畸輕方爲平允必當逐層分晰明定章程始可行之久遠而勵戎行其應如何分別酌定處分之處著軍機大臣會同吏兵二部詳悉妥議具奏

十二月癸卯命整飭苗地邊防○壬子諭大學士梁國治學品端醇小心勤慎數歷中外簡直內廷襄理機務洊擢綸扉方資倚畀前以感患痰喘屢遣御醫診視並派御前侍衛豐紳濟倫前往傳旨存問令其安心調理以冀速痊茲聞溘逝深爲軫惜著晉贈太子太保派皇十七子帶領散秩大臣一員侍衛十員前往奠醊仍

實給銀一千兩俾治喪事其任內降革罰俸處分均予開復所有應得卹典該部察例具奏○命兵部尙書王杰軍機處行走○丙辰諭朕披閱朱載堉樂律全書所論音律算法稱引繁賾但其中較律呂正義一書疏漏歧誤之處正復不少蓋樂律算法義本相通必須講求貫串以期畫一卽如樂律以黃鐘爲本而尺度之長短視累黍爲準但黍有縱橫亦有大小顆粒若用縱黍則較長若用橫黍則較短其大小顆粒亦如之原難定以爲準也是書所論橫黍百粒當縱黍八十一粒之說尙爲牽強又書中所載樂譜內填註五六工尺上等字並未兼註宮商角徵羽字據未免援古入俗自應倣照律呂正義逐細添註方爲賅備蓋古樂皆主一字一聲如闕闕睢鳩文王在上等詩詠歌時自應以一字一音庶合聲依永律和聲之義若如朱載堉所註歌詩章譜每一字下輒用五

六工尺上等字以五音分註未免一字下而有數音是又援雅正而入於繁靡也卽以琴瑟而論上古操縵亦係一字一音後世古樂失傳而製譜者多用鈎擘埽拂等法以悅聽者之耳遂使一字而有數音幾與時曲俗劇相似更失古人審音知樂能使人入聲入心通之意且如殿陛所奏中和韶樂從前未免沿明季陋習多有一字而曼引至數音者聽之殊與俗樂相近經朕特加釐正俾一字各還一音目今朝會大典鐘簾鏗鏘備極莊雅業經載入律呂正義彰彰可考獨不可融洽貫通乎著交管理樂部算法館之皇六子永瑤及德保鄒奕孝喜常會同精覈朱載堉所著此書分門別類務將樂律全書較律呂正義疏漏歧誤之處分列各條公同詳悉訂證如書中凡例體裁逐加考評載於提要之後以垂永久而昭釐定○戊午封鄭華爲暹羅國王制曰我國家誕膺天

眷統御萬方聲教覃敷遐邇率服爾暹羅地隔重洋向修職貢自
遭緬匪破滅之後人民地土悉就摧殘實堪惻憫前攝國長事鄭
昭當舉國被兵之後收合餘燼保有一方不廢朝貢其嗣鄭華克
承父志遣使航海遠來具見忱悃朕撫綏方夏罔有內外悉主悉
臣設還羅舊王後嗣尙存自當擇其嫡派俾守世封茲聞其舊裔
皆因兵革淪亡鄭氏攝國長事既闕再世用能保其土宇輯和民
人該國臣庶共所推戴用是特頒朝命封爾鄭華爲暹羅國王錫
之誥印該國王尙其恪修職事慎守藩封撫輯番民勿替前業以
副朕懷柔海邦興廢繼絕之至意○己未以張廷化爲湖北按察
使由鹽運○庚申諭朕恭閱 皇考世宗憲皇帝實錄有嚴禁建造
生祠等項一條煌煌 聖訓所以禁革陋習杜絕虛浮者至爲明
切卽如各省德政去思碑並換帖宴會以及坐省家人門包押席
東華續錄

等事從前歷有明禁通行頒發乃行之日久地方官遂心存玩忽
視爲具文我 皇考勵精圖治十有三年整綱飭紀政治肅清如
耗羨歸公添設養廉諸大端無不定立章程著爲令典此皆我

皇考旋乾轉坤之力實當萬世法守若至朕躬而稍有懈弛朕甚
懼焉况建造生祠及換帖宴會等事經 皇考飭禁之後至今未

逾六十年何至又煩朕屢降諭旨申明訓誡此非督撫過目不儆
於心乎我 皇考承 皇祖六十餘年深仁寬大之後加意釐剔

因時制宜所謂一張一弛原有不得不從嚴者至於此等禁革陋
習整飭官方之事實爲至當不易不但我君臣皆當時時謹懍卽
我世世子孫亦當永遠遵循嚴飭臣工守而弗替此卽我大清億
萬年無疆之庥若該督撫竟敢陽奉陰違將頒定科條因循廢弛
卽屬變易成法罪莫大焉著各督撫等將此旨入於交代永遠懍

遵恪守毋負朕諄諄訓諭之至意○乙丑諭據總管內務府大臣奏乾隆五十五年值朕八旬萬壽請循照前例諸王內外大臣虔造無量壽佛延禧祝嘏等語因思朕六旬七旬萬壽該管大臣俱先期奏請成造佛像以申慶祝惟時朕恭侍 聖母皇太后慈闈凝禧篤祐內外臣工共抒忱悃是以俯允所請藉用承 歡錫慶茲因朕八旬之慶先期備辦非朕所喜且回思益增悵然朕仰邀 昊眷年逾古稀康彊勤政惟期日慎一日敬迓 鴻庥以俟八旬有五之歸政朕一人之福卽億兆臣民之福又何必循用具文徒滋繁費乎所有該管大臣等奏請成造佛像之處著不必行○丙寅閩浙總督常青奏臺灣彰化縣賊匪林爽文結黨擾害地方十一月二十七日知縣俞峻在大墩拏賊遇害縣城失陷臣聞信飛咨水師提臣黃仕簡領兵二千名由鹿耳門飛渡進剿並派副

將參將都司等帶兵分路夾攻臣駐泉州與陸路提臣任承恩居中調度委金門鎮總兵羅英筴赴廈門彈壓飭沿海州縣防範咨廣東浙江督撫嚴查海口堵拏諭軍機大臣等臺灣地隔重洋民刁俗悍屢次滋事今有彰化縣賊匪林爽文等糾眾騷擾殺害官長攻陷城池尤爲罪大惡極不可不痛加殲戮以示懲創彰化知縣拏匪被害該縣不能嚴密防範雖失之疏懈但帶兵緝犯事屬因公並著該督撫查明該縣如平日並無別項劣蹟及激變情事卽據實奏聞候朕降旨交部議卹至黃仕簡甫經病愈一聞匪犯滋事之信卽帶兵渡臺殊屬奮勉可嘉著賞給荷包等件以示優眷並著於辦理接捕諸務外仍加意調攝勿過勞動至賊匪么臍烏合黃仕簡到彼督率該鎮道盡力堵剿無難立就撲滅但恐餘黨四散竄逸或偷越內渡常青任承恩見駐蚶江一帶著嚴飭沿

海口岸地方文武員弁實力巡防最爲緊要常青徐嗣曾等總須
不動聲色妥協辦理若因外洋遇有此等案件該督撫紛紛調遣
迹涉張皇轉致內地民心生疑駭殊有關係該督撫不可不處
以鎮定也○戊辰福建陸路提督任承恩奏彰化縣被賊匪攻陷
俟督臣到泉日臣卽登舟渡臺協同黃仕簡勦辦得旨豈有兩提
督往辦一匪類之理若不誠是巧詐若誠是至愚又奏查臺灣賊
卽漳州頑民屢次滋事懇簡重臣到閩督辦得旨更不成話不料
汝亦如此至愚諭軍機大臣等此等奸民糾眾滋事不過么厖烏
合上年臺灣卽有漳泉兩處匪徒械鬪滋擾等案一經黃仕簡帶
兵前往督辦立即撲滅今林爽文等結黨橫行情事相等該提督
到彼匪黨自必望風潰散卽使該提督病後精神照料未能周到
亦止可添派能事總兵一員多帶兵丁前往協勦乃任承恩竟欲

親往豈有水陸兩提督俱遠涉重洋辦一匪類置內地於不顧之理至所請簡派欽差督辦更不成話督撫提鎮俱有綏靖地方之責設一遇匪徒滋事輒請欽派大臣督辦又安用伊等爲耶從前康熙年間臺匪朱一貴滋擾一案全臺俱已被陷維時止係水師提督施世驍帶兵渡臺進剿總督滿保駐紮廈門調度不及一月卽已收復歲功伊等豈竟未聞之乎又據常甯馳奏詢悉淡水同知程峻之子程必大彰化失陷文報梗塞情形已派兵二千二百名令任承恩及參將福蘭泰等由鹿耳門前進會同夾攻等語與前奏大槩相同任承恩本不應前往今旣已渡臺亦不須拘泥回任務須實力勇往會同黃仕簡分路夾攻速擒逆匪以期剋日歲功常甯仍止須駐紮蚶江廈門一帶調度策應此時總以鎮靜內地爲要○是歲朝鮮琉球暹羅來貢○會計天下民數數各省通

共大小男婦三萬九千一百一十萬二千四百八十六名口各省
通共存倉米穀三千七百四十六萬四千一百五十四石五斗三
升八合